



Q U Æ S T I O M E D I C A ,

*Cardinalitiis disputationibus manè discutienda in Scholis Medicorum,
die Jovis decimâ quintâ Martii. 1708.*

M. LUDOVICO DE VAUX, Doctore Medico, Præside.

An potus, instante somno, noxius?

ALIMENTA, corpori reficiendo nata, solida alia, liquida altera sumuntur. Illa nutritioni, cibique nomen habent, hæc illis diluendis, imprimis inserviunt, potusque sibi nomen vindicant. Cibus, ut potè variis coalescens partibus, præparationem exigit, cujus in ore, dentium & succi salivalis ope, prima recipit rudimenta: Fluiditatis gradum quemdam ibi adeptus, œsophagique propellentibus fibris, in ventriculum labitur, qui alterum in ingestam massam evolutionis gradum, tentat ac peragit. Hoc chylosoos opus non unico fibrarum, quibus intertextitur ventriculus, motu conficitur; succus glandularum, quibus refertur tunica media, suam huic labori dat operam, sales in alimentis solvendo, ut & massam, ut par est, diluendo. Dum fibrarum ventriculi elater viget, attritionis debitæ perficitur motus, & succi diluentis quantitas & requisita indoles chylum simul omnino absolvunt, modò idonea ministretur materies. Cibus sulphuribus crassus, salibusve fixis impeditus, ventriculi nifus eludit, nec satis conteruntur sulphura, unde tenax chylus, unde ructus nidorosi, coctionis difficilis & operosæ argumentum. Sales fixi humorem nullatenus sufficientem in succo diluente reperiunt à quo valeant dissolvi, verùm indigesta salibusque effœta moles remanet, coctionis impeditæ per ructus acidus emittens notas. Sua quoque subit vitia succus ventriculi, chylum ideirò contaminans, & in ventriculo & intestinis ut plurimum generans saburram, variis nominibus, pro colore & sapore distinctam. Succus idem etsi vitiorum expertus, exuperans complura inducere valet incommoda, fibras relaxans, chylum nimis diluens, unde prava chylosis, hæmatosis perversa, omnium unde functionum error: ea enim est ventriculi fors, ut quæ non potest subigere, ipsum ipsa eadem primariò lædant, aliasque corporis partes in postea pervertant. Quam benè igitur Divinus senex suaserit, respiciendum potum, instante somno, inde nemo non cognoscet.

CHYLUS, massa liquida ex alimentis prompta sapore dulcis, colore alba in ventriculo primò condita, in intestinis & lacteis vasis deinceps peracta, suas servat qualitates, dum assumpta naturæ fuerint consona. Non in omnibus, quas perlustrat partibus, ipsi color idem: in ventriculo cinereus; in lacteis vasis albus; prout magis evolvitur, intensiorem adipiscitur albedinem. E chylo probè subactò laudabilis exurgit sanguis, cæterorumque succorum naturalis proventus. Ut varias impetit partes chylus & cola permeat, à quibus novos evolutionis recipit gradus, ità si malè steterit illorum structura, debilisque actio, malè repurgabitur, vitiosque ideò sanguinis fovebit rationem. Ventriculus, intestina, vasa lactea simul, vel singulatim male afficiantur, corrui chylosis. Vasa lactea obstructa chyli anadosin sistunt, hinc partes alimoniam fraudatæ paulatim marcescunt, ut ex atrophiam dignoscitur. Intestina bile succoque pancreatico degeneribus infarctà chylum pervertunt; febrium non insolita origo. Ventriculus ob nimiam fibrarum relaxationem, vel earumdem crispaturam læsus, non unius tantum morbi sit parens, imò omnium queis corpus oppugnatur. Malè à ventriculo læso bonam speras chylosin ipsi optima mandando alimenta. Cibis quamvis nutritii succi omnino dives indiget motu qui oleosas partes atterat & explicet; qui verò imminutus vel depravatus, crudum viscidum salibusque foetum sanguini admisceri chylum sinit, cujus pervertitur crasis. Non modò liquida hisce, ventriculi errore, malis alterantur, solida quoque labefactantur, pro mutuo inter utraque naturali commercio. Utrorumque læsionem igitur mirari desine, ubi laborat ventriculus. Corpus universum languere, læso ventriculo, non minùs ac ratio, suadet praxis. In morbis plerisque emeticum stupenda, in ægrorum solamen, profert, in ventriculo morbi fomitem hærentem excutiens ac eliminans: sic, qua gravabatur, sarcinam solutus venter, suam recuperat integritatem quam, chyli probè subacti beneficio, cæteris partibus communicat.

III.

POTUS cibus diluendis idoneus, ad sitim explendam imprimis requiritur. Sitis natura in salibus evectis & expeditis consistit, qui suos in solida faciliùs aculeos inurunt, unde sollicitudo quædam animal agit ad quærendum id quo ea compescatur affectio, duntaxat à liquido expectandum. Horumcæ salium actio, sitis nomen habent cum œsophagi membranam laceßunt: alibi alia sortiuntur nomina, liquidoque variè usurpato eluuntur, ut in pruritu, balneo. Varii in usum venere potus præter aquam; vinum, sydrum, zythum, mulsam aliosque factitios pro diversis regionibus homines assumunt potus. Ex his ut ut quid boni exurgat, aquæ simplicis multo inferiores, ut potè sulphuribus salibusve effocti, à quibus sitis nequaquam extinguitur imò augefcit, & ventriculo cæterisque corporis partibus cris-

3
 paturæ inferri valent, unde tam in solida quàm in fluida pedetentim morbus irrepit. Arthritis suam sæpius originem trahit à salibus lixivioso & acris, acidove in vino solutis, quod fit palam in regionibus vini feracibus, in quibus destillationum omne genus, morbus velut endemicus, apud potatores ipsorumque nepotes grassatur. Sydra, zythum suis scatent vitis, nam præter sales quibus resorbentur, partes lentæ sanguini succum viscidum suppeditantes, ipsum insciunt & quasi irretiunt, unde morborum sobolescit Ilias. Clades alias procreant alia potius genera, prout illorum mixtionis fuerit natura: quò plus ab aqua simplici recedent, eò plus labis inurent corpori. Et si aquæ potus naturalis sit omnino, suum tamen modum habet, quem superare periculosum; nam plus ultra, vel intempestivè sumptus, morbos, si non extemplo, imminentes infert, ventriculum cæterasque alvinæ regionis partes à muniis avertendo. Somnum idèò potui supervenientem, ea eadem corpori mala invehere quid mirum?

I V.

SOMNUS, sensus communis feriatio, motus externi intermissio, viribus refocillandis à natura concessus, in nos irrepit blandus & ex naturæ voto ob fibrillarum nervearum, à sero seu rore, ortam relaxationem, vel subsidentiam. Spirituum animalium penuria, pro laboribus exhaustorum easdem fibrillas subsidere non nunquam est in causa; hinc ab immoderato exercitio somnus. Sopor, vigilandi magis impotentia, quàm somnus, à succis vitiosis & exuperantibus oritur, pro succorum indole varii invadunt sopores, quales carus, coma, lethargus, à quibus nunquam corpus restauratur, imò frangitur, utpotè contra naturam corpus afficiens. Alius est quem ars inducit vel pedum, vel totius corporis tepidâ lotionem, aut papaveris, opiive ministerio. At uti naturâ invitâ accersitur, majora sæpe vigiliis incommoda post se relinquit. Somnus verò naturalis is est, qui statis temporibus in nos irrepit, qui nec longior, nec profundior, qui animæ, ut & corpori, novas vires addit. Quamvis ex naturæ præscripto & blandè afficiat, certas tamen audit leges; nam ut ipsius beneficio humores intrò congeruntur, propter musculorum externorum sistitos motus, ità si diuturnior, majori copiâ rerenti, torpidos spiritus, nervos, cæterasque partes laxas, & quasi resolutas efficiunt, mentemque ipsam stupefcentem præstant. Quæ corpori admoda, somni diuturnioris gerunt vices, eadem invehant incommoda. Qui balnearum usuræ longiori se se committunt, illorum mens ut & corpus languet ignaviâ. Quanto igitur periculosius potui adhibere somnum. Non solum exteras partes, uti balneum, afficit potus; verum & internas & immediatè ventriculum. E somno potui superveniente humidi copiosior proventus, unde ventriculi fibrarum resolutio, spirituum velut immersio, chyli nimium diluti imperfectio. Semina copiosiori liquore aspersa, haud faciliè suas di-

mittunt oleosas partes, pistillique eludunt ictus; émulsionés ex his vix eliciuntur. Hæc damna alimentis ventriculo mandatis indubiè procreas, cum importuno indulgebis potui. Somnus humores retinet. Potus novos suppeditat: ab his alimenta subacta nimis diluuntur, ventriculi fibræ languidè suos agunt motus: ità alimentorum informis & indigesta moles citiùs rapitur, si ad sanguinem, ipsum inficit, solidas labefactat partes: pro crassitie, lacteas venas si nequit permeare, diarrhœam, celiacam, lenteriam, cæterosque alvinæ regionis cruciatus portendere non impar.

V.

QUALIS igitur fuerit illorum metus? Quibus arrident tot naturæ insueta, cum in iis quæ vires valent recreare, levis error, tot involvat pericula. Nunquam suis eum beat amplexibus amica sanitas, qui auream non diligit mediocritatem, nec adversus mille mala unquam esse poterit tutus. Verùm ut diversa te non deterreat rerum ratio, morbosum à sano statu discriminare. In quibusdam febribus largior aquæ potus morbum solvit. A potu diuturnior abstinencia hydropicos perfectè sanavit. Sed ubi benè se habet corpus, potus somno adjunctus ipsum ad extrema perducit. Utriusque idem est effectus, si non in omnibus, saltem in plerisque. Uterque corpori, humores, etsi diversimodè, addit. Si quis sitiens superdormiverit, per somnum sitis fit expleta; corpus à somno humectari argumentum. Ut potùs genus multiplex, siquidem alimentosus, medicamentosus alter & potus simpliciter usurpantur, ità pro eo quod inter eos intercedit discrimen, se se mutuo non nunquam innoxie valent excipere. Pro vini largiori potu sitis, ardor, febris, & instante somno, aquæ simplicis potum admittit & postulat, brodia, ptisanæ quæ sitim creant, aquam diluentem exigunt quovis tempore, ut salum fiat solutio, sulphurumque attemperatio. At verò nisi hæc rerum similitudine urgeat necessitas à potu, somno instante, caveas. Divini senis mentem evolve. *Qui, inquit, bibere noctu appetunt, iis vehementer sitientibus, si superdormiverint, bonum.* Hæc breviter nullisque illustravit rationibus, more axiomatum quæ veritatè fulgent & innituntur.

Ergo potus, instante somno noxius.

Proponebat Parisiis FRANCISCUS POUSSE, Cenomanus, Baccalaureus Medicus. A. R. S. H. 1708.

Typis Viduæ Francisci Muguet, Regis & Facult. Medicinæ Typographi.